

Tutú e táxnū San Pablu iña Filémuun

Taxnū Pablu tútú iña Filémuun

¹Xu'u é Pablú u, é nuu kutū ú kuenta iña Jesúcrístu ne, ntuví u ni ta'an ko Timōteu ntáde vá'a ntí tutú sāl'á iña nto, Filémuun, tsi dóo vá'a tiin ō é dadii tsi ntáde tsiñu ō. ²Iña ta'an ko Ápia di, ni Ārquipu, ña é dadii ntáde tsiñu ni'i ntí, ni ūn ntíí ntíí ña kuínti'xe i, ña ntánataká nuu nú vi'i nto kán. ³Na naxnuu viko Xuva ko ni Tó'lo ko Jesúcrístu nto; na tā'xi ña é vā'á koo kuntōo nto.

Dōo kakuinima Filémuun e dóo kakuinti'xe ña

⁴Utén utén kanakué'ie ú sintiá'vi nta'a Xuva ko kuēnta iña nto dá kākā'an ntā'ví u. ⁵Tsi é kūtuní ko tsi dóo kakuinti'xe nto Tó'lo ko Jēsuu, dóo kakuinima ntó ña, ni ūn ntíí ntíí ña kuínti'xe i san. ⁶Kaikán u nta'a Xuva ko te kūvi ka'an vá'a nto iña nuu i é kākūinti'xe nto, vata koo é na kūtuni ñá'a iña i é un ntíí é vā'a é ni'i ko nta'a Jesúcrístu. ⁷Dōo díní ko, dōo ka'nu kuiní ko kuenta iña nto, tsi dóo kakuinima nto, tsi dóo nátsu'un ka'nu nto ini ña ntákuinti'xe i san.

Kaikán Pablu uun dá xe'e iña ña kade tsiñu, ñá nani Onēsimu

⁸Dukuān ne, ñá kaū'ví ko é kāl'án u ni nto nēe é vii ntó kuenta iñá Cristu. ⁹Ntá tsi díí ka vā'ā ó, kuiní ko, te kākán u da xe'e kuenta iña i é kākūinima ntó Xuva kō. Xu'u é Pablú u ne, é atā ú ne, i'a nuu kutū ú vevii kuenta iña Jesúcrístu. ¹⁰Xu'ú kaikán u nta'a nto kuenta iña i'xá ko Onesimu. Kaka'án u tsi i'xá ko ña, tsí xu'u é nakuā'á u ña nté koo kuinti'xe ña Xuva ko ñi dukuan nuu kutū u.

¹¹Kidāā ne, ñá ni kānuu á'vi ña iña ntó, ntá tsi vevii ne, e dóo kainuu á'vi ña iña ntó ne, iñá ko di. ¹²Nataxnūu xtuku ú ña mí tuví nto. Ntá tsi vá'a tsi koo víí nto ni ña vata tsi te mií u. ¹³Ntio ko é kūtuví ka ñá ni kó vata koo é xntii ñá kó naa nto dá nuu kutū ú a kuenta iña tú'ūn va'á san. ¹⁴Ntá tsi ña iní u nee iña é ntio nto. Dukuān ne, ñá ni kāl'án u ni ña te kutūví ka ña ni ko. Ña ni ntíō ko é kuē'e kuetsí u nto é vii ntó da xe'e, ntá tsi te mii ntó ntio nto ne, kuví. ¹⁵Á te itívi xio ña uun da'na vata koo é nāki'i xtuku nto ña é kutuví ñá ntii dañu ntūvi. ¹⁶Tsi ñá te da mii tsi é kade tsiñu

ña iña nto ve, tsí díí ka nuu á'vi ña ve, tsí e kúvi ña ta'an kō, ña e dóo kuinima ko. Xu'ú ne, dóo ntio kó ña. Ntá tsi ðivi ntō ne, á tē díí díí ka kue'e ntío nto ña kuenta iña mii ñá ne, kuenta iña Tó'o kō ði.

¹⁷Te tā'an nti'xe nto kó kuiní nto ne, nakí'i nto ña vata tsi te mií u. ¹⁸Te io mí'i é kō'xó nteē ñá, o te nēe iña é itá nuu ña iña ntó ne, nadita nto kuentá ko. ¹⁹Xu'u é Pablú u kaka'ū ú nta'a mií kó ne: Xu'ú ntanáa u. Ntá tsi ña ncho ka'án u ni ntō tsí tē ña ðiví u ne, ñá ni nī'i nto ntuví va'á iña nto. ²⁰Sá'a vii ntó da xe'e kuenta iña Xuva ko vata koo é na kūnuu ðíni nimá ko. Nāxnuu ka'nu kudii ntó nimá ko, tsí ení ko nto kuenta iña Cristu.

²¹Taxnūu ú tutú sá'á iña nto, tsí iní u tsí kuinti'xe nto é kākā'án u ni ntō. Iní u tsi díí díí ka xntíi nto ña vatā o é kākā'án u ni ntō. ²²Uun ká tuku é kākán u nta'a nto ne, te na kōo tú've mí'i kutūví u. Tsi tá'xi Xuva kō é kī'xí u mí ntoo nto, kuiní ko, tsí kuān o ntaíkan ntó nta'a ña kuenta iñá ko.

I'a ntí'i tutú san

²³Ení ko Ēprafa, ña é dadii nuu kutū ú ni i kuēnta iña Jesúcrístú ne, taxnūu ña ntiusi nto. ²⁴Marcu, ni Arístarcu, ni Dema, ni Luca, ña é dadii ntáde tsiñu ni'i ntí ne, taxnūu ña ntiusi ntó ði.

²⁵Na nāxnuu viko Tó'o ko Jesúcrístu ntó un ntíi ntiíi nto. Sá'a tsi é ká'án u ni ntō.